

■ GLOSSA

Integrain ch'i tut pitga fieu!

DA SILVIO CAMENISCH

Qua, nua ch'ìls babs dil concept èn preschents e las medias filmeschan, vegn integrà, ch'i tut pitga fieu! Quests plazzals d'integrasiun totala da la damaun baud fin la saira fitg tard ston vegnir survegliads da fieus probabels cun in sistem d'alarm raffinà da la damaun baud fin la saira fitg tard. Sco enten quella Val Purchera da merdas; quella sa co quai va. Pudess gea esser ch'ìls dretgs geniturs u pervi da mai geniturs-attrappa na fissan betg a chasa, cur che «noss uffants dals cors» stuessan ir a scola statala u turnar.

Donna, donna ve a chà, cha tes hom at clo-ma» u cuntrari, emblida! Perquai avain nus scolast integrativas, canortas, temp da bloc, maisas da la damaun, da mezdi, da la saira. La magistraglia interchantunala ha final finalmain chapì il ferm dictat da la moda, e la moda da quest atun s'integrescha total cun las colurs da la stagiun, quella na «grescha» betg dal recent! Oje! Qua bragia e sbragia ina scolasta, giuvna e bella, jung und schön, totalmain sur-lavurada giu, jau manegel isada tras schon ussa cun la nova sfida; qua na gida nagina spida; far si mongias e spidar en ils mauns na gida qua nagut.

Quella ha vulì da memia, quella ha gi mess la latta bler memia aut tar sasezza e siglida sutor ed è ussa crudada or. Quella è ussa brischada or da l'agen



fieu sacré. Oje. Quella era motivada, sche quella nun era betg, era nagina. Quella leva dapli, leva tut! I dat da quellas gea, jau manegel tai, ti es manegiada! Quella leva crai jau dus u trais u quants diploms, certificats, bachelors dad integrasiun e devoziun, uschia sa numna ussa quella religiun. Scolasts, scolastas fitg fitg observant(a)s brischan persuentar, da dadens anor. Jau mez uss er, sun tschiffà e col! dal fieu d'entusiassem. Ves'ins quai? Dastg'ins er vesair. Vesair ed esser vesì er qua!

Unfrendas da brischà. Uor, quellas datti adina. E vegn tuttina u na pir da dretg fotocopià, taglià, mutilà, circumcisà per turnar a fotocopiar tagliar, mutilar, circumcisar e turnar a far tschients, millis, fegls da lavur. La lavur na va mai or a nus, cun l'integrasiun totala pir da dretg betg, ed anc sch'i dess ina stgiradetgna parziala da la gлина plaina, la lavur integrativa quella stat. Guarda qua, tge di noss concept! Quel tschantscha clartext, quel sto vegnir «mess enturn» «umgesetzt» din ils babs dal concept (jau mez,

mia paucadad schess «realità», signur Lenk, ma jau na poss far il «lenken» qua nagut!)

Dain nus gas vinavant uschia sco fin dato en quellas scolast ensi ed engiu, duvrain nus en pli proxim avegnir, ti mo spetga!, duas pedagogas curativas per mintga uffant, trais magisters per mintga classa da regla, quatter mainascolas per mintga partiziun da scola fundamentala, ch'i dastga er esser ina directura giuvna e bella u pli veglia cun meglras qualificaziuns: diploms, certificats, bachelors tant sco ch'insatgi vul. Quella vul manar la meglra scola, quella vul gudagnar in auter onn il Grond Premi Scola!, quella ha ussa quell'ambiziun, sincera-main: jau n'avess betg quella!

Elas scolastas da Fulda u Schilda suan e taglian e sortan e tatgan e collan e faudan e stgarpan e collan e copian, sco sch'i na dess betg in damaun! Quellast han uss en senn insatge, quellast han ussa prendi a cor la sfida e «mettan enturn» el, il concept. Uschè ditg che nus mettain enturn el, na metta el betg enturn nus, din las surmotivadas, ch'è adina malsegir ch'i pudess dar u fieu da strom u desperasiun cun tut quai che tutga tiers: dimora integrativa en la clinica da guaud (dr. psich. Herbst) e suenter la «reha» da lunga durada, lungas spassegiadas tras las aleas, scriver brevs sms e tschivlottar e turnar a far, cur che la feglia croda.